




T 3210/8546.81

18





CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
MAY 7 1940

錢塘縣志卷之二十

人物政事

錢塘縣知縣南樂魏嶺纂

哈佛大學漢和  
圖書館珍藏印

錢塘縣志

孔門四科一曰政事惜其徒皆屈於邑宰家臣之小  
而不及見其大用錢塘之以政事稱者漢晉以前無  
聞斷自三國吳始迄宋明而大盛自卿尹以及長吏  
或以經濟或以忠讜或以廉介或以慈惠其品不同  
而其致君澤民之道則百途而一致猗歟不綦盛歟  
志政事

錢塘縣志

卷之二十

人物政事

一

吳

褚泰

泰仕吳封臨平侯立心仁厚政寬刑簡惠澤及民後居錢塘為郡著姓歷六朝至唐代有顯者

褚璆

字伯玉遂良曾孫擢進士第累拜監察御史裏行先入中突厥圍北庭詔璆持節監督諸將破之遷侍御史拜禮部員外郎氣象挺凝不減在臺

宋

錢億

字延世元瓘之子叔之弟歷事佐叔時佐議鑄錢錢以益將士祿賜億諫有入害其言鑿鑿可行判明州有善政疏諫俶指民丁以益軍旅嘗和俶民勞逸由君奢儉詩因陳諷刺性俊拔善屬文建隆初奏授奉國節度

錢暄

字載暘惟演之子任郎官知開撫台三州有治績除少府監又知鄧州為三司鹽鐵副使時勾考諸

路逋租兩浙轉運使當坐負暄因對從容為言逋租不入以頻年饑故今使者被罪必亟歛恐民不堪惟稍寬乃可集得免出知鄆州除寶文閣侍制卒暄素好學皇祐中撰後漢功臣年表藏之秘閣所至不為赫赫名而既去見思

丘岳

字中人為於潛縣簿建學校進後學人皆稱之

元奉宗

字知禧德昭之孫景德二年甲科及第知通州海門縣地苦斥鹵奉宗為鑿池注甘泉人甚利之遷博士拜屯田員外郎告老歸杭奉宗天性好靜舊居闔闔間謂人曰富春佳山水吾將卜居焉景祐戊寅冬卒

唐肅

字叔元七歲以能誦五經知名與孫何丁謂曹商游世稱孫丁曹唐肅為人清直廉儉恬於榮進咸平初登進士第為秦州司理有夜宿逆旅而同宿者殺人亡去旦起視之血汚其衣為吏所執不能明遂

自誣服肅為白其寃而知州事馬知節趣具獄肅固持不可後數日果得殺人者就辟擢本州觀察推官遷著作郎知洪州艤舟南康或問其故曰職田以四月為限今遽往得無趨利乎踰月乃上仕至龍圖閣待制天聖

八年卒

元絳

諱昭之後也天聖中進士江寧推官攝上元令知通州海門縣清豪占寬淮民販鹽皆嘉績也為廣

西轉運使儂智高反嶺南兵宿邕州絳供軍餉繕樓堞以功累遷翰林學士工於文辭拜叅知政事以太子少保致仕卒謚章簡有文集數十卷

錢彥遠

字子高以父任為太廟齋郎大理寺丞復舉進士又舉賢良方正策入等由太常博士授祠部

員外郎慶曆七年知潤州因災異上疏極言國家備寇之術未至牧民之吏未良天下之民未安西北二口我之堅敵今北口據幽燕山後元昊盜靈武銀夏伺我間隙收我亡叛又湖廣蠻獠戕害劫掠生民流

離調發督歛軍須百出其憂不細惟陛下念此三方講長久之計以安元元性命牧民之吏生民之休戚繫焉守令失則一方做利害切於身飢寒逼於內彼不起為盜賊則愁苦之氣必致水旱臣願精擇天下長吏此根本之論也時旱蝗民乏食彥遠在潤發常平倉賑救部使者詰其專彥遠不為屈召為右司諫請罷數赦擇守令增俸入以養廉吏息土木以省工費遷起居舍人直集賢院知諫院彥遠性豪邁其任言職數有建明卒年三十七

俞灝

字商鄉世居杭登紹熙四十年進士第仕淮東宣撫丘密令其佐畢再遇救山陽灝料口必窺采石

請回軍石梁河以遏其鋒口搗虛不入而遁再遇知揚州盪平江湖多灝計畫再遇欲誅脅從者救活甚衆開禧議開邊政府密引灝畫計灝言輕脫寡謀之人不可信趙良嗣張覺往轍可鑒歷秉旄節皆有聲寶慶二年致仕築室九里松買舟西湖會意處竟日忘返以詩詞自適號青松居士集

吳師禮

字安伸師仁之弟元豐五年進士調涇縣主簿知天長縣召為太學博士元符初除秘書省正

字以預餞鄒浩免建中靖國初任開封府推官擢右師諫改右司員外郎師禮工翰墨徽宗嘗訪以字學對曰陛下御極之初當志其大者臣不敢以末技對聞者獎其知禮以直秘閣知宿州卒初師禮遊太學江公望心重之後相遇於泌陽公望謂曰得志當何如曰當為人作豐年爾由此定交及詔師禮按治蔡邸事獄成不使一詞及王吏間有論死者亦不被以指斥罪時江公望為左司諫徽宗問公望以師禮之為人公望以賢對擢左司諫

元

孫德潤

字以誠由江浙行省掾吏仕為處州松陽令先是縣籍失實力役無稽民困於徭役適郡符下項畝以上會等其磽沃以出貢賦任徭役籍既具民

大悅錄其事刻于石

鄧文原

字善之綿州人父漳徙錢塘文原年十五通春秋至元二十七年行中書省辟為杭州路儒學

正至大三年授江浙儒學提舉皇慶間科舉制行文原校文江浙慮士守舊大書朱熹貢舉私議揭於門延祐四年陞翰林待制五年出僉江南浙西道肅政廉訪司事平江僧有憾其府判官理熙者賄其徒告熙賊熙誣服文原行部按問得實杖僧而釋熙桐廬人戴汝惟家被盜有司得盜獄成送郡夜有焚戴氏廬者而不知汝惟所之文原曰此必有故乃得其妻葉氏與弟謀殺汝惟狀而於水涯樹下得汝惟屍與漬血各俱在焉人以為神仕終集賢直學士兼國子祭酒經延官天曆元年卒後贈江浙行省叅政賜諡

文肅

夏若水

世祖至元二十九年授温州路總管初至郡歲歉廣招米艘民賴以濟雪冤獄創永嘉書院朝

命造征瓜哇船若水慮吏胥病民令民備材躬董其役民咸德之

明

周斌 洪武初知登州九年登地並海民瘠斌撫綏有方民日熙阜勸學崇教使海取僻壤興於禮樂

張昇 字仲高弱冠有才識為郡吏以清謹稱諸為奸利者皆敬憚之洪武間超授吏部郎矢志堅貞終始

無玷及卒上察其廉特給驛舟遣內臣送柩還

金師古 洪武初知分水縣修築壇壝教民播種後陞永州府同知民思之不忘

梁大舉 字仲仁洪武間以人材徵授陝州判官卓有異政母老辭歸家素饒裕而自奉儉約好士喜施

七十 三卒

湛禮 字用和永樂進士累官韶州知府韶歲貢藤而產於南海禮為疏於朝得免又曲江豪民二十餘戶

皆投充軍戶以免糧差列狀以聞得勘正嘗遣隸卒往樂昌法外需求令械來禮下教旌令賢由是府役

至邑皆歛戢以清白自持及引年歸貧乏幾不能自存

徐昂 字仲規永樂初由鄉舉授兵部司務陞刑部郎廉謹無他技有武士謝某者暮夜懷金來饋堅卻之

無何昂致仕還過姑蘇病卒貧無以殮謝聞之為具棺衾遺之人謂昂廉吏謝長者

吳福 字天爵起家刑部掾屬以從征闕寇功授兵部司務景泰二年復從都御史蔣琳撫貴州尋改工部

福廉直不苟取嘗過寶應宿驛中獲遺金數百急呼驛官掌之詰朝牒付縣為修學費尚書倪謙學士錢

溥紀其事仕終南昌知府子俊孫光世相繼以科第顯

金廷瑞 字信夫正德己丑進士累官光祿少卿加賜金綺亾何為嫉者所構免歸方瑞守鎮江時武宗

南巡道出淮南供億不貲非嚴幹吏不足任撫臣遂以委瑞無不立辨會久雨湖決諸臣懼罪計不知所



出瑞徐行視曰不足憂也噴林健石幾火夜作而隄塞龍舟獲濟中人法外需索不得欲困瑞夜分傳詔曰上將矢魚趨具網瑞即具網上亦不獻也臺部使以為才交章薦之會世宗稽古正郊廟之制瑞以才臣綜理益瘁為司空所引重然多與中貴忤竟誣搆去瑞性孝友母寡居少歡瑞以色養得母歡心事伯兄多推與田宅人稱其孝友

劉敬宗

正德十四年鄉舉仕至南昌通判甘貧嗜學博綜羣書為諸生已有聞譽晚授令長愛民如子惟恐傷之以不諧上官投劾歸衣食每不足處之泰然大守陳仕賢高其行買宅居之

許貫之

字道卿舉於鄉十年不上春官攻苦食貧蕭然寒士嘉靖乙未登進士授吉水令時按浙使者吉水人也意有所屬貫之曰如此則有市心矣拒不可愛養部民若子權貴干請一切謝絕由是吉水治行為江右冠而士大夫多憚其峭直有疾者徵入為兵科給事中將去官即出已資葺屏宇繕器具以待

後尹曰吾不忍重勞民也在諫垣七日而歿行篋惟故衣同年親故代為之殮死後妻子貧乏幾不能自存

沈南金

字子卿嘉靖癸未進士授南京大理評事晉寺副寺正擢廣東廣州府知府處官以誠以杜請託忤時貴徙雲南鶴慶府移疾歸家居蔬食布衣不入公庭性抗直不能容人過即尊貴者嘗面折之至其奉親色更溫潤若出兩人年七十九卒

許三省

字一所錦里人以嘉靖戊午舉人授官萬曆時超遷為山西道御史三省負氣岸有肝膈以待

御巡鹽兩淮不取羨餘抵鳳陽吏曰當往謁鎮守璫廖三省曰人臣未拜陵寢先謁內侍可乎廖知三省將至質明灑掃具酒醴以迎三省卒不至左遷夔州守三省守夔有惠政時猛虎噬人三省齋戒檄之者三虎斃壇下民建伏虎亭以表之後璫又誣以他事罷官三省去官年纔四十二角巾詩酒無幾微怨色

八十六乃卒三省幼時母乳癰三省將親吮之醫曰母病愈顧兒中母毒矣三省不聽卒吮之百日愈俄面腫如斗不飲食者累日亦百日愈所居在缸醬橋西賣魚橋南居民稠密三省九世祖澗關已居開義街以便行旅至今名曰許衙街

錢騰蛟

字子雨嘉靖壬子舉於鄉就漳州府教職歷知潞州海州皆有惠政祀鄉賢

翁相

字輔卿浩之子嘉靖戊戌進士仕至廣平太守廣平為畿輔地郡守出入輒得陳兵幟羽葆儀衛甚尊寵縣吏供帳甚盛相至悉罷去嘗單車行屬邑郡多盜白晝劫獄殺吏民甚橫相構得其尤桀驁者法之餘悉縱舍盜旋解散河北諸郡飢相不及聞開倉賑濟全活甚眾治行稱河北第一旦夕報遷相移疾歸居鄉耿介貞素不入官府與許右使友善以古道相切劘為諸生時有魯男子行未嘗對人言臨歿自志其墓

潘願龍

號雨田性介直不為嬖媚嘉靖乙丑成進士柄國者欲招致門下授庶常不屈選知秦州有異政擢刑部郎恤刑湖廣多所平反陞揚州守內艱廬墓足跡不入公府補福州兩郡臬貨輻輳纖塵不染時日為清官第一備兵潁上潁多盜河數決龍設方畧盡殲諸寇鳩工疏濬河以永寧有塗山令誣庠生某為盜置大辟龍按實黜令雪生寃鳳陽節推馬某迎直指意羅織良善龍大怒名節推切責之氣盛痰壅卒於公座士民悲號罷市爭釀金殮之塑像以祀子懋功萬曆丙午舉人澧州知州精吏治有循良稱陞南雄丞却土官餽贍稅務羨金無所取懋學士子副榜

王國楨

字君翼萬曆丁未進士歷守中都惠州臨江三郡明習吏事所至以鋤豪強見稱數與大吏爭是非意所不可咳唾直侵其面天啓甲子卒臨江人哀之如私親有從子曰克家崇禎庚辰以明經賜進士為涑水令亦有仁政卒於官

黃思道

號默菴萬曆庚午鄉薦除知代州代稱巖郡甫下車即當編審手自裁覈減大戶止以十六名收解區別貧富上下其則民始息肩代賦有夏秋差站等項立條鞭法輸課有程代故例以正身民壯出邊防守官給費至是止徵銀鈔募僱塞下民節省前費常賦之外有門課委巷不免悉為裁革代驛衝煩昔議召募後仍編正戶盡皆逃竄致驛宰宵遁雉經始立召募法保全者無算礦徒哨聚三晉震恐督撫用思道策渠魁果自縛崇學校寬刑罰三晉吏治無兩晝夜勤勞竟構暴疾而亡俸餘數金殮且不給代民悲號罷市贈中大夫廣東右叅議今追贈資政大夫吏部尚書

錢養度

號如卓廣西兵備副使錢立季子立生三子長為司勳養廉次雲南副憲養度季養度伯仲皆早達萬曆丙午舉於應天五上春官不第壬戌謁選授江西永豐令豐故瘠土人捍俗薄胥吏為窟穴尤好指斥惟薄民俗輕生遇織芥即投環仰藥家立破養度廉得其弊以至誠感之不務擊斷令豐四年陞

南司城遷秋曹主政喟然歎曰吾書生今父子兄弟皆皇恩拔擢乃乾沒不已乎遂告歸子喜起崇禎庚辰進士為司封後

出守南昌有傳

吳繼志

字惺陽以歲貢為夏津管河縣丞夏津古郟邑近清涼源衛水所由入漕七八月間漕運將至旱涸則淺膠及水大發則兩岸不辦牛馬斬柳而塞之日夜不敢息治河五年以註誤謫雲南越州衛經歷有惠政人皆愛服三年以終養乞歸繼志為人讀書通大畧學有根柢事父母以孝聞及子宮詹太冲貴贈如其官卒

年七十有四

張懋謙

號顧存萬曆壬子舉於鄉歷官九江知府九江權關臨大江商人輸稅往往遭風濤劫掠之害懋謙就老觀塘濬河建閘可泊百餘舟令避險阻增修七門城樓勸民積穀以備荒穢大盜剪凶頑郡飛蝗殺稼獨人九江者盡死旱潦有禱輒應晉貴州按察司副使備兵寧貴四年棄官歸

江源達

字瀾甫年四十舉於鄉知武岡州時岷王老有廢疾法令不行宗人怙勢驕蹇尺布斗粟出死力爭之源達居官廉常祿外一介無苟得務以清淨惇大為治初蒞官牒訴盈案久乃門可雀羅移疾歸蕭然環堵自號五一山人

吳大山

字仁仲世居鳳凰山之燕窩光祿寺卿果之子萬曆時隨父任京書授內閣中書辛卯中順天鄉試以孝廉為部郎任滇南叅政皆有聲跡滇有富商為盜所誣家破而冤不雪大山至滇一讞而出之人以為神州牧有以寶玉精鏤求注上考者大山曰暮夜之金可畏也其人懷慚而去未幾令休歸於西湖築別業焉植老桂修篁顏曰輞川

張大烈

字言冲天啓丁卯舉於北雍五上春官不第以舉人司李江西之瑞州清勁有聲讞獄多所平反署郡篆山城民瘠鎮以安靜人皆愛戴之不善事權貴竟以浮躁去官崇禎壬午有詔起廢輒不及吳

太冲為南京國子司業乃移書於吏部曰前瑞州司李張大烈居官廉潔晨餐不給今有詔起廢而不及是所取者情面所去者人品吏部得書大慚然竟不舉大烈事父母以孝聞與弟大勳同居有無相助好面折人過聞者掩耳去官家居貧甚至不謀朝夕卒後子天竟無嗣

鄭尚友

字士弘年三十餘始補弟子員萬曆戊午舉於鄉崇禎辛未成進士尚友為孝廉十七載惟以教授為事足跡不至公庭及成進士授福建長樂令愛民勤政縣有大豪犯罪力致之法六年考天下清官第一及陞見對上語自稱知縣上拂然僅轉工部主事

錢朝彥

字殷求崇禎庚午舉於鄉丁丑成進士知句容縣蒞任數月有飾金珠偽為藥餌獻者立置之法巡司某畏令嚴以茉莉為餽發視得金語之曰若欲嘗令乎心不可欺也相顧愧謝歲飢民晝掠於市至火民居朝彥曰民飢可原也獨無一二奸魅嘯聚如流寇所行乎廉得其首惡斃杖下民始戢江南世

家勢重壓民朝彥嚴禁其子弟奴僕賦由是平令句  
容六年有飾飛語誣朝彥者調簡得旌德投劾歸貧  
甚至不給晨夕至借壻家以居杜門二  
十年病卒無以殮其妻許哭之哀亦卒

錢喜起

字武山天啓甲子舉於鄉崇禎庚辰成進士授  
南京工部屯田司主事以過答一武生生故驕

且有所恃鼓衆登其堂喜起盛服出曰此朝廷所命  
也吾非有私怨辱生生自有罪耳君等奈何以身試  
法衆遂散出守江西南昌南昌故多楚宗宗強多不  
法吏莫敢問童子試時輒雜民籍中衣巾而入訶之  
曰楚宗喜起牒下曰先一日試楚宗餘日試民籍童  
子至試期楚宗無一人入者明日試民籍亦寂然於  
是搖手相戒曰太守彊直毋犯之南昌大治以丁艱  
歸歸值國變終身不踰戶惟春秋祭掃一再出門性  
慷慨無飾語見人有過輒面數之其人面赤不爲  
止然忘爾我事過卽已士以此敬之卒年八十餘

陸運昌

鳴時

鳴燧

運昌初名鳴勳弟鳴時鳴燧相  
友愛父東易名家卽以父爲師

父歿共爲砥礪先後舉於鄉甲戌運昌成進士得永  
豐令遷吉水抗疏蠲逋條治清丈皆報可當運昌解  
豐篆時民攀車者衆皆會詞下戴香泣送以內艱去  
吉水亦然未幾病卒 國朝順治初鳴時補岷縣諭  
邑有某生者以貲雄一方挾縱橫術持令短長鳴時  
曰惡莠也鋤而去之生憤甚中以蜚語邑士多保鳴  
時獲洧白遷國子監典籍兵部司務予告歸鳴燧以  
疾廢于家嘗曰易卜筮書也古今精于易者以左氏  
爲首韓周秦以下卜筮象間發以已意爲二十卷  
未成書竟逝運昌子五人圻培堦垣堦自有傳其餘  
皆以文學名世

馮一鴻

字同野以父嘉慶籍山西中萬曆王子科山西  
舉人爲華陰教諭以正心誠意之學訓多士布

政陳富頰爲築西京聚奎館拔關中諸生三十七人  
屬一鴻爲之師轉封丘令始至卽爲民償宿逋賊將  
犯境則豫練鄉勇賊散有捕獲者諭使爲良民歲旱  
禱雨雨卽降鄰邑仍旱如故邑人立禱而神弗應遷

真定郡丞士民追送及攀留者至數百里為立去思碑以記其政績云其任真定如其在封未幾解印綬歸里

裘自謙

號養齋由諸生貢入成均以積分高第得謁選四川鹽課司提舉蜀之瞿灘一井當田百畝非

豪猾不得有井於是新井既不增舊井滋益廢追呼逋課商民不自存自謙至請蠲舊稅其不獲全蠲者捐貲代償且為整理舊井以招徠之商民復業始至纔百井越二年至萬井增課累萬餘御史臺交章特薦下部議議不次優擢以示風勸會有息之者謂提舉階正五藩相位列三品乃轉准王右長史准王初封廣州正統間賜以黃蠶尚方劍遷豫章饒郡頗驕縱自謙抵任廣綜古藩服得失上金鏡錄又屏除教坊女樂輔王敦正誼遠聲妓王悉從之准藩支庶衆多不自檢束自謙每引宗正條例裁抑之後引年告歸居家好仁行義萬曆時歲大饑出粟賑貧乏全活無算巡按上其事賜建尚義坊以旌之所居城東之

井行汲者憊甚乃穿井得清泉遠邇賴之迄今羣稱為表公井當相淮時却太原永豐王尚郡主於其子曰布衣尚主非耦且慮以貴戚重得罪其持重務大體類如此云

楊承憲

字毅菴九歲能屬文由歲貢授海鹽訓導課士有法改金華蘭溪與士子講明理學以金華四

先生為宗一時士子咸知為學之本尋遷教諭新昌未及行卒於署卒之夕闔邑士民吏胥皆夢至學宮迎土穀神及覺聞署內哭聲羣起言其事遂立祠祀之承憲初無子晚年娶蔣氏生子綦願甫十八月而承憲歿蔣氏纔二十有三護喪歸里過嚴灘風大作舟幾覆蔣伏棺痛哭俄頃風息僅而獲全家貧無依或婉辭勸之蔣泣曰楊氏只此孤兒苟有二心其嗣絕矣志益堅苦節五十餘年年七十有二卒綦願後能孝養其子若孫皆有聲庠序

國朝

**俞有章**

字紀方號易菴上虞人也弱冠為錢塘弟子順治丙戌舉於鄉闈墨行稿為一時所宗中乙未

副榜授淮安司理發奸摘伏多所平反淮為南北孔道舊例漕艘過淮上下官例積有陋規章不受遇有犯輒繩之以法軍不敢漏弁不敢漁擢為禮部儀制司巨細事例傍搜博采有所條畫朝上夕報可分校春闈號稱得士慷慨好施周卹貧乏事繼嫡母王氏至孝移所生母之封以封繼嫡

**吳百朋**

字錦雯父思穆以明經為和平令百朋工文章下筆數千言立就崇禎壬午舉於鄉丙戌後日

以詩酒自娛無復仕進心已念父老貧無以供謁選蘇州府推官蘇漕務刑獄最繁百朋用官收官兌法一切獄訟得平反猾吏豪蠹皆斂手津要人過吳門者不時見投函非露封不發以簡抗得罪中考功法明年乃得白復補肇慶郡粵撫軍素知百朋名接之厚凡所興除悉得行其志會司李職裁補南和令北之俗凡官府廉明者士民咸標旗幟樹壁上旌之南和旗幟為滿卒於官子薦能讀父書隨父治蘇州時

顧咸建二子為怨家所訐將名訊薦見其牘請曰顧公賢令當十世宥此獄不足竟也百朋憐其誣遽銷

案後百朋候勘抱沉疴馬觸暑走金陵營救感疾歿年二十人稱其死孝云

**吳道煌**

字瑤如先世嘗徙京師登順治己丑進士性爽直無城府初任得武康武康山邑無城郭為劇

盜窟穴道煌下車告曰盜非吾赤子乎乃飭保甲訐奸宄悉罷諸掩捕令治邑期年無一賊犯境者已補閩中經獻賊之亂荒殘衝瘠師旅絡繹供億稍不給輒生亂道煌單車往區處民獲安堵以卓異召擢儀部尚書郎出守吳蘇州州新立駐防兵地方騷動會奉部撤回觀望不即去以舟楫資伏為解撫軍問道煌道煌曰禁兵驕縱遲一日則民受其禍計惟名諸守協濟以速其去某請先辦其事即具屏屨集餼糧且曰太守為諸軍祖道弗逆

詔旨速罪也萬艘一夕發里巷歡呼慶更生吳郡財賦甲天下故事分解諸部寺內外吏因緣為姦長吏多得罪去道煌建議當歸司農法治畫一有巨家以他事

牽連慮不測以家釀進發之皆珠也道煌力却之且為雪其罪有妄男子指某通洋起大獄株連數百人道煌驗其海船叱曰誣也凡海船必用巨木長數尋貫首尾曰龍骨非此不行無則民間江湖細舟耳竟從末減道煌為蘇州且五年吳人德之留居吳不使去又為立生祠於虎丘春秋為壽酷愛酒大醉治事如故時稱為我

**鮑經綸**

字欽生歙人因祖業避遂籍錢塘順治辛卯舉於鄉己亥副榜擅文章盛名授陝西鞏昌縣固叢山劇邑軍民番彝雜處前任諸令以荒地逋賦累於官者六人壬子秋值淫雨飢饉屢告經綸毅然慨百姓災傷卑騎三赴臯蘭泣陳其事始得具題隣封西邑亦邀其庇竟以勞瘁卒於任是時白陽閭井等戶各建坊祠番人燒酥之炙羶以祭哀悼之聲震數百里

**錢世清**

字生一辛卯貢入太學授中書舍人循例選戶部郎晉僉事備兵南韶值靖南移鎮水陸役夫

至數十萬州縣束手世清詣其營閱甲兵士卒實數汰其無名者然後出金僱募民爭為之役南韶近海海民以南洋為窟穴番船上下多竄奸宄為大盜耳目事發輒牽引無辜與緩其獄世清條牒諸吏約束之皆不敢犯清遠鎮弁劉某素貪殘誣民剽劫擅發卒擒男婦百餘人掠治事下世清一訊即破械遣歸且具言鎮將殃民狀鎮弁服罪去尋以裁缺歸甲辰補永平分巡道改通永道通州密邇京畿旗民雜處世清調劑得宜兵民無不懾服以親老請養卒於家

**高包謨**

字彥玉相國儀從孫國初以諸生請纓從征有功仕為粵東仙遊縣再遷河南固始邑南北通六穎多盜東抵霍多強族西屬州多悍卒催科無術率鋌而走險謨以為非因勢利導漸漬以文教則財利機權之習難卒化也於是聚人士而噢咻之奢則示之以儉儉則示之以禮或粹若瓊瑋或銛若干將比三年豪強輯而循謹者衆彬彬文雅之俗焉修固始縣誌體裁整而蒐輯廣在任八年卒



翁世庸 字用公順治戊戌進士初為思恩令遷隴州知

州王輔臣叛秦隴震動世庸連上血書請兵未

至城陷被執世庸不屈以死自誓俄聞

王師至賊驚遁去世庸走將軍營合兵進討以復隴州功

陞貴州廣南知府兼攝學政廣南無城郭學校世庸

教以禮讓沙人儂人咸知懷德繪迤東輿圖輯方畧

備考進呈內艱歸里

補臺灣府未底任卒

何恭錫 字京左少孤家貧事母以孝著念父萃資志早

歿朝夕肆力於文章癸卯膺鄉薦出宰興平廉

明報最為關中治行之冠後補滇南邑

令擢粵西養利州牧所至皆有循聲

徐湘 字月岸有幹濟才畧為廣東長樂令縣故粵之小

邑人不知學湘做昌黎治潮故事為立鄉校擇鄉

進士為之師名童子肄業其中而出廩米以給學生

厨饌由是邑興於學縣南襟海西南多連山深篁叢

箐為盜藪湘乃擇精幹吏偽為賈販入其地與賊市

久之盡得其主各本謀亡匿處乃率吏隨其後殲渠

魁數人餘黨悉罷遣復為民有獲竊盜者湘問何故

為竊對曰貧無以養母湘乃賜之錢千而諭遣之逾

年湘夜巡至水次戶外有懸網呼其人出問之即前

為竊者也曰感公賜錢買網以捕魚為生足以養親

矣因頓首謝一富民兄弟爭財訟連年不解湘至各

以暮夜報金求曲庇湘歎曰此歷年所以不決也乃

呼其兄弟為陳人倫孝友之道奈何以財故而肆行

不義乎因譬以禍福之言兄弟皆悔悟涕泣相讓訟

以之平歲旱發倉米為粥以食餓者又勸富民輸粟

共濟其事南鄉民不戒於火燼者過半發錢穀以賑

之一時歌頌有男女而今賜自徐之句以內艱歸共

為立祠以繪其像歲時絃歌之再為蜀之中江令攝

西充篆俱有善

政以疾歸里卒

俞品 字脩遠性明敏通達治體初仕為柳州通判曲盡

情詐厭塞群疑得寬猛之宜以才能調太平通判

太平近交南所轄皆土司叛服不常品循撫有方威

濟以恩蠻性貪而貴吏清前任率好餽遺為所患苦

人物政事

及品正身率已威化大行陞河間府同知時瀛郡為九河下流漳水子牙歲多水患特設河員用冢宰薦以品董其事品為修築隄防時加疏濬水患以平又以水地多荒土教士人做東南水田法布穀開墾給之農具闢田至萬餘畝百姓賴其利乃特簡大名知府賑飢捕蝗嘉禾朱草之祥屢聞於朝忽

一夕疾卒卒之日民皆流涕為立祠

趙廷標

字叔文國初以明經授閩之永定縣時既越

之東郊廷標集耆老兒童鼓吹張綵設仗啓門以迎而伏甲於城隍間賊不疑其備趨之伏起掩擊殲焉陞衡州府同知攝府事自闖賊之亂湖南齒豁徧野廷標設法收卹外扞逋寇內養孑遺數年然後定

王師平西南經畧以廷標薦遂備兵安普安普諸蠻未靖多為土官所誘廷標以監軍決策行間復故時維摩地其寧州彌勒巴盤八甸驚惶未定廷標移檄諸蠻悉罷逐捕之令諸持鉏鉤田器者皆為良民持兵者

乃為賊單車巡行安撫由是諸路悉平調廣東按察使分巡廣肇南韶道安普民暨西堡諸洞聞廷標當去乃塹其路且發巨石塞其城闔曰願留公公毋行廷標慰諭再三然後去適川湖兩廣八排諸嶺寇起聞廷標至立解散其德威所至如此以憂去服闋改長沙驛鹽道兼理糧儲事甫至會湘東民變巡撫韓某四顧曰此非趙副使不可於是語廷標曰湖南民望君如望慈父母忍不一行乎廷標乃單騎往民望見之皆投竿涕泣悔訴廷標散遣之廷標以文儒請纓試為吏而敷歷東南二十八年中以軍功顯至是始脩嶽麓書院營堂室市田蓄廩米會諸生讀書其中廷標親自飭勵而誘進之俄遷布政司叅政督陝西糧儲道時廷標已病而九郡士民相率乞留會武昌兵變羽書至湘潭廷標強起視事累月而病益篤乃告歸抵家而卒事聞勅贈嘉議大夫賜祭葬

洪吉臣

字載之明中丞洪瞻祖之子中崇禎癸酉順天鄉試庚辰會試副榜賜進士性孝少時母患篤疾中夜籲北辰求代母病積久誠禱不倦夢神教以服蘆根湯果愈時人方之丁公藤云 國朝庚子授湖廣德安府推官時三楚大旱德尤甚盈路皆餓殍吉臣首出俸貲繼以借貸又勸富民共出粟米所在賑濟凡十有七次民得全活德安六邑士民作五仁五清之歌以紀其德去官之日父老子弟攀轅者不絕所著書有明文禡廿一史識餘學圃憲 蘇警世錄後場類典羣書備考藏於家

洪秉銓

字玉衡官廕生 國初受 貝勒王委劄任嘉勦敵命秉銓監軍請於帥曰逆命者激也海鹽皆順民宜禁兵士母入城士民慶更生勒石學宮禾中巨族陸朱彭陳尤為甲姓秉銓為之維持保全甚眾再任邵武同知丁亥七月建寧變起固守郡城鄰邑順昌流民乞食者千餘賑濟全舌無筭署建寧縣事多著勞績有孫六人半登科甲而邑庠生福星讀書孝友有文名

陳履升

字峻天性孝友讀書日數行下家貧無以承菽水歡因探外舅于閩之漳泉值海氛甚熾圍城匝月城中升米數金有攜其婦若女以求鬻者或勸履升納之忿然曰可乘人危以自娛乎傾橐中金遣以歸後授浮梁縣佐時浮梁方罹兵燹履升甫至方伯姚啟盛一見奇之歎曰小吏中乃有此人物耶畱之軍前輓輸絡繹必委履升履升感國士之知不避險艱而軍需克濟浮梁平四郊瓦礫井邑丘墟履升撫綏而招徠之首請開閉糴之禁以拯流離之初歸者新安諸郡賴全活者甚眾景德產瓷瓷足必識以字履升通詳上臺勒石永禁窰民集數百金以奉履升曰六書聖賢公寶舍此遂不足適用乎厲邑卻之有挾勢刦布商于鄱陽湖殺六客而掠其貨于景德市之月餘前有鬼環署而哭履升心動密訪詫其形迹有異及事主根尋至第呈貨之來歷不敢直指其為盜也履升請于邑令邑令畏勢不敢問履升曰奈何視官太重人命太輕乎旋用計密擒其窰郡司馬陶耀聞之愕然曰子龍渾身都是膽也時亂方平兵

卒驕橫守弁胡某虐民民苦之履升列其惡蹟六十餘條上之胡懼陰謀中履升既而悔曰陳君正人也敢不服且謝過焉其勇敢為人所難類如此涖任三年輒厭棄五斗辭歸家居以課子孫為事優游泉石間享年七十有七以子恂貴贈中憲大夫提督山東學政右春坊右中允兼翰林院編修加六級三子愷戊子科舉人孫鉦辛卯科舉人科第蟬聯人皆以為積善之報云

馬鑾

字殿音嚴州府建德縣人以明經先後兩任杭州府儒學訓導為人溫文爾雅謙以下士而考課有

方文以先正為宗學以程朱為要士咸師尊之任事勤敏先是巡撫張著四書大成鑾與參訂之末

及中丞徐

於萬松書院會浙多士讀書其中凡

御頌周易折衷朱子全書備文韻府諸書舉屬鑾較訂精確無門王亥豕之訛布政段

委修文廟尊經閣

文明樓及兩廡祠宇鑾飭工庀材雖竹頭木屑皆得其宜每春秋饗射必稽式古典籩豆干戚之容備之於列棗弧蓬矢以射菟首服方領習矩步者委蛇乎

其中冠帶縉紳之人圍橋門而觀聽者嘗數千人咸以為扶風絳帳之盛不是過云年五十七無疾終

論曰聖門多賢才曰果曰藝曰達皆政事之選也有

才以為立政之本臨政而乃見才之用若黃霸之治

潁川龔遂之治渤海卓魯以教化為先召杜以興利

為亟雖設施各殊而功名並建亦可見才器之攸分

矣其或勲庸功伐不必皆顯而所守亦無玷缺皆彬

彬乎循良之亞也哉

皇上於科目之外立賢無方而錢塘之筮仕於外者徃徃

有以政績發聞於時豈非行義以達其道者歟自前

明以迄

昭代共得若干人亦東南竹箭之美已

錢塘縣志卷之二十一

錢塘縣知縣南樂魏嶸纂

人物 忠節

忠之為義大矣經國家定社稷安民人利後嗣不以  
忠名而忠莫過焉魏徵有言曰願為良臣不願為忠  
臣此禹臯稷契之所以欣逢堯舜也至時窮勢迫計  
無復之不得已而繼之以死濟則利國不濟則隕身  
歲寒松柏雖與日月爭光可也志忠節

唐

褚遂良

傳載大臣

宋

鞠嗣復

宣和中知休寧縣方臘黨攻破縣欲逼使降面斬二使以怖之嗣復罵曰自古妖賊豈有久長

者爾當去逆從順因我而歸朝爵尙可得何為脅使我降賊不聽嗣復知必死不少懾厲言何不速殺我賊曰我縣人也明府宰邑有善政我不忍殺乃委之去初嗣復聞難率吏民修城衆樂赴工守備畧就朝廷知之加直秘閣擢知睦州為賊所傷力疾渡江乞兵未至而卒

唐恪

字欽叟以廕登第調彬尉辨冤獄召為屯田員外郎大觀中牂牁內附持節招納寇始懷疑裹甲以

迎恪盡去兵衛單車從數卒行寇望見懼呼投兵聽命以奉使稱職遷右司員外郎徙滄州河決水犯城下恪乘城救理水去城得全召拜戶部侍郎京師水暴至汴且溢付恪治之或請決南隄以紓宮城患恪

曰水漲隄壞無可奈何今決而浸之是魚鱉吾民也亟乘舟相水源委乃決金堤注之河決水尋平入對帝勞之曰宗廟社稷獲安卿之力也恪再拜因上疏言水陰類也至犯宮闕天其或者以陰盛之沴微告陛下乎願垂意時事益謹天戒宣和初遷尙書進少宰及金人逼百官立張邦昌入城取推戴狀恪不書名仰藥死

唐琦

琦臨安衛士也高宗航海琦以病留越州李鄴以城降金人琶八守之琦袖石伏道旁伺其出擊之

不中被執琶八詰之琦曰欲碎爾首死為趙氏鬼耳琶八曰使人人如是趙氏豈至是哉又問曰李鄴為帥尙以城降汝何人敢爾琦曰鄴為臣不忠吾恨不得手刃之尙何言斯人為乃顧鄴曰我月給纜石五斗米不肯背其主爾享國厚恩乃若此豈復齒人類哉詬罵不少屈琶八趣殺之至死不絕口事聞詔為立廟賜名旌忠

楊九鼎字叔鎮以父任入官帥襄漕夔有善政後易利

大散關又復早郊殺偽元帥完顏阿璘寇大憤益發

兵至九鼎死守清野原除太府少卿總領蜀賦時都

統吳政戰沒麾下兵潰敵據漢中擣大安軍九鼎檄

張威何進勦敵於三泉匹馬不返會蜀有新帥首招

潰卒至鷄公嶺復叛帥聞變即遁有勸九鼎遁者答

曰九鼎有職守不可去賊至遂遇害後宣闡戮叛卒

奏九鼎以死守職乞厚加卹典以勸盡忠

有旨賜五官至朝議大夫官其子三人

余古光宗初罷拾遺補闕官近臣罕進言者紹熙二年

五月古以布衣上書曰間者側聞陛下宴遊無度

聲樂不絕晝之不足繼之以夜宮女進獻不時伶人

出入無節宦官侵奪權政隨加寵賜或至超遷內中

宮殿已歷三朝奚用更建自古宦官敗國備載方冊

今上而三省下而百司皆在此曹號令之下蓋自副

將而至殿步帥各為高價但如其價則有特除此為

害之大者良由公卿持祿保位備員全身如漢之石

慶唐之蕪味道滿朝皆小人也陛下果能以漢文帝

為法唐莊宗為戒即乞昭示詔旨嚴下約束除太常

樂工立定員數凡俳優舐戲皆放而為民美女麗人  
自今無獻宴開以時酒進有數宦官不得干預朝政  
佞倖悉去忠良並進問安侍膳之餘宮庭燕閒講讀  
經史怡神養性享名教不窮之樂固嵩嶽無涯之壽  
豈不休哉帝震怒始議編管  
言者救之乃送秀州聽讀

謝緒理宗皇后謝氏之族也世居邑之安溪孝女北鄉

兒時浴于溪探水底得光明珠忽雲霧滃起有物

蜿蜒作攫拏狀緒不為動色及長善讀書為會稽諸

生彬彬稱儒者性剛決持論慷慨尤樂善好施與鄉

人咸敬之以椒戚故不復求仕進祖墓在金龍山遂  
築望雲亭而隱焉于時天目山崩緒泫然曰天目為  
臨安主山今崩矣國其危乎德祐二年宋帝北狩時  
謝太皇太后以病請留元兵突入宮昇之而去緒大  
慟題詩二章云立志 尚未耐莫言心事付東流  
淪胥天下誰能救一死千年恨未休湘水不沉忠義

氣淮淝自愧破秦謀茗溪北去通 留此丹心

莫笑狂夫老更狂推輪怒臂勇螳螂三軍未復

圖中土萬姓空悲塞外鄉動地聲名縣宇宙擎天氣

槩蕩邊疆忠自古人有莫笑狂夫老更狂書畢

與其徒訣曰生不能報國恩死當訴之上帝異日黃

河水北流是吾效靈之證也遂赴水死時茗水陡湧

高丈餘緒尸立而逆流山川變色禽鳥異聲舉葬于

金龍山祖墓之側立祠其旁後明太祖戰于呂梁敵

兵乘流而下垂敗忽河水逆行空中聞人馬聲旌旗

隱隱見金龍字遂得捷是夜太祖見夢儒巾深衣歷

歷述生前事且曰兄弟四人緒居其季遂下詔封緒

金龍四大王御親為製贊天啟丙寅總督漕運蘓茂

相疏請加封護國濟運金龍四大王凡舟行黃河者

神應如響宿遷呂梁以及凡有漕運之地並立廟而

故里祠墓亦屢加修葺焉

國朝封顯佑通濟金龍四大王

特詔有司歲時致祭緒之先為康樂之苗裔世居上虞東

山祖達徽宗朝為淮浙提舉以蔡京柄國棄官徙家

安溪及卒神于鄉咸淳中封廣應侯伯孟英宋封五

道十一相公父仲武登進士仕至司徒宋封司徒十

三相公叔季畧宋封橫克五相公妻吳並受神封神

明之胄世著靈異而緒以孤身徇國巖巖嶽嶽其有

得于天地之正氣而由明迄今東南輪輓實神之床

其所以福國而庇羣黎者功不其偉歟昔者神禹治

明

袁興

錢塘衛千戶戰諸暨有奇功不自伐又嘗解銀甲

易粟以食饑卒明師進攻雲南請為先鋒力戰死

詔贈官

沈道南

建文時御史金川之變死節

授命日戒子孫毋習舉業



陳鏞 字叔振永樂乙未進士初入翰林得盡讀中秘書

征交南兵部尚書李慶贊軍務聽擇六卿之屬才且

賢者自輔時儀制郎中豐城史安有盛名鏞名與之

相埒慶薦用此二人並待以殊禮二人屢進忠益慶

與主帥初聽之繼不納所謀至敗被執鏞顧謂安曰

吾輩見危授命耳皆不屈死鏞為人厚重清介

所言所行表裏一出於正所著有桂林集三卷

于謙 傳載 大臣

夏誠 字克誠宣德乙酉舉人正統初任沙縣教諭清慎

有志操部使者上其賢擢監察御史已巳車駕北

征誠扈從至土木乘輿陷敵中誠死於難後朝廷追

錄死事忠勤官其子繼先至撫州知府六世孫國賓

操行醇謹壽至九十有五八世孫

融力學能文屢薦不售士林惜之

孫繼魯 字道甫雲南籍錢塘人嘉靖癸未進士授主事

仕至都察院右副都御史以諫忤旨杖卒隆慶

改元贈兵部左

侍郎謚清愍

翁鴻業 字一燾號水因父常豫萬曆己酉舉人鴻業以

擬第一甲第一名數日矣忽閱卷誤入分崩字乃易

之舉業自萬曆乙未後時格最庸穉主司患之鴻業

始創為警挺間雜以子史文體大變天下靡然從之

號曰翁姜體謂鴻業及同年生姜思睿也易二甲第

一當與館選閉戶靜坐不投津要僅以儀部郎出為

廣東憲副轉山東提學誨諸生力學讀書知忠孝之

事時羽書旁午一日十驚絳帷蕭然飭巾待盡

王師時破山東雜俘中以行號於市曰我提學山東錢塘

翁鴻業也我死期不負國千秋之後幸知有此人

遂自投於河而死弟駿業甲子中副榜與兄齊名

吳太冲 字默寘號若谷豐寧里人海寧籍也生而穎異

弱齡即沉酣六籍以忠孝自勵天啟辛酉選貢

丁卯登應天賢書崇禎辛未成進士置三甲上覽其

策而善之曰此巨儒也拔翰林授檢討庚辰分校禮

闡充編纂六曹章奏改編修兼東宮講讀太冲初為詞臣而烏程宜興相繼持國政太冲無所附麗與婁東張溥無錫馬世奇清江楊廷麟保德王邵會稽章正宸相善時稱辛未詞林六君子崇禎末天下已岌岌震動天子方罪已責躬懸重賞厚祿鼓勵臣下無敢直言者太冲以詞臣侃侃不少屈請嚴加爪重撫綏端勦賊俱數十萬言為東宮講官故事必先呈內閣改定後錄講筵太冲獨自為講章不經閣覽反復開導及時事流涕慷慨東宮羨歎辛巳上枚上閣臣屬意太冲召對平臺同列并研陳演於未宣旨前已逆探上意上顧太冲前太冲跪奏曰臣之所陳似迂然國家至今日如病羸瘵不特消伐元氣迅利肝膈之劑不可用即驟服參苓效亦不可且夕期也上默然次日中官傳旨索前奏更繕疏具上且言端揆調燮之地社稷所係國命攸關以一言之合而驟登以一日之長而遽信果如聖諭行之可也萬一質本柔奸外飾文貌聽之若易用之或難鼎鉉而兆折足之嗟泰階而卜中台之圻縱有大戮及其身家如國事

民命何不聽而陳演即日入閣矣量移南國子監司業時監規頗傲南尤雜冗不振太冲獨破崖岸而為之生徒肅然所得多奇士如盧象觀魏學濂黃淳耀陸符等尋轉右春坊右中允以外艱歸弘光稱制以禮部右侍郎召不赴馬士英阮大鍼棄主而遁時路王稱監國三上牋請斬之路王畏士英噤不敢發士英乃與大鍼謀奔金塘上內閣及兵部印不辭而去太冲遂薙髮為僧

國初以原官徵三徵皆堅辭卒年六十太冲孝友耿介植綱抗節屢勉孤忠崎嶇九死晚號宮泉頭陀議者方之疊山云

俞起蛟

字芝雲以明經起家拜魯憲王左相憲王薨肅王立入學行釋菜禮起蛟獻泮宮頌致規諷焉

王欲廢世子起蛟察世子孝從容入告力持得免肅

王世子立值魯告歲大無起蛟勸王賑饑自出相

祿二千石繼之泰山盜李青山聚黨劫掠勢張甚起

蛟與范黃門淑泰力戰俘其眾崇禎十五年

王師攻兗城急王拊膺容起蛟云先生何以教我起蛟正容對曰君死社稷臣死君義止此耳十二月兗州破

魯亡王死社稷起蛟率家二十三人以殉

**傅巖**字野倩號辛楣金華義烏人從其祖父遊於杭遂家于紫陽山少孤貧及長好讀書作詩賦古文詞

皆鏘理刻肌風瀾特妙天啓辛酉恩貢甲子舉於南雍崇禎甲戌成進士得徽州歙縣縣鄉俗囂雜又族大民頑好訟競力纖芥微事必閱歷數年根株旁邑即破家不止巖剪惡扶善輕役減刑始得生聚如故邑中四望皆峻山峭嶺平時多伏盜賊巖立治盜法身自督健兒搜捕有盜五十餘人晝行河西橋且議劫獄巖乃先往擒之盜聞令且至欺令書生猶匿廟中樹幟廟門潛窺令何為巖控馬射其幟矢擊刃口鏗然盜羣駭曰令勇盡越戶去追獲十三人舉循良第一後以讒去官弘光南渡以禮部主事起官不赴朱閣部大典以使相駐師金華疏巖以御史監其軍金華平大典絕巖出城之東旣求援師追及于金華

山中不屈死之娶姜孺人有婦道相敬如賓巖父子俱卒姜遷其柩于武林子三齡文齡發齡熙皆有文名齡文別有傳齡發齡熙抱父屍以死語在孝子傳中

**王道焜**字昭平父國柱以孝廉起家為廬州府推官量移兗州府同知遂拂衣歸道焜天啓辛酉舉於

鄉再上公車不第司鐸福寧旋令南平南平為閩海孔道供應既煩奸宄百出道焜飭保甲練軍實嚴讀法捐倉廩皆有方畧三膺首薦為主爵所抑遷南雄府同知是時光澤有妖寇之亂閩父老謂道焜才望足以坐鎮於是撫按交章請留加同知銜仍知光澤事議者羣謂增裨設備請兵會城道焜皆不可單騎入賊營諭以利害賊為散去一邑以安時上急吏治謂非破常格無以開功名之路盡取天下賢能吏至京將親試不次擢用撫按以道焜名上銓曹以郡丞無考選例題陞兵部職方主事道焜遂拂衣歸後聞崇禎帝崩兩京失守道焜與陸行人培同日縊死時乙酉六月初三日也子均崇禎壬午舉人亦終身不

仕自  
有傳

陳潛夫

字元倩初名朱明仁和人錢塘籍崇禎丙子舉於鄉潛夫為人跣弛自喜不屑與齊輩同俛仰

國中莫能善獨姚奇亂嚴沈兄弟時時左右之三試南宮不第改今名謁選授開封府推官是為崇禎十六年闖賊已踞關中且窺晉河南諸州駸駸瓦解矣潛夫至開封上奏請重兵守單懷遏賊勿南下而身渡汴聯絡號召復開封通郡地會降將陳德叛縛巡按蘓京去而巡撫秦所式奉旨已解任乃奉周王渡河入杞縣項城陳留諭土寨以圖匡復漸有部署時弘光南渡姜曰廣當國即擢巡按河南監軍御史已而曰廣去國馬士英惡之所請多中格以私人越中杰為巡撫事事為所牽制潛夫孤立少助已而有許定國殺高傑之變事在國史定國既殺高傑來降而急召潛夫遣緹騎逮繫詔獄既而士英出走事遂已曾王監國加潛夫太僕寺少卿監軍浙西已加大理寺少卿擢僉都御史甫命下而浙東西皆歸順

本朝潛夫歸山陰抵小赭邨江上虛無人於是潛夫長慟

謂其妻孟氏曰勉之吾為忠臣而為烈女孟氏笑曰此吾心也與其女弟櫛髮更服以待女弟者潛夫妾也潛夫整衣冠拜祖父已拜別其母與弟攜二夫人至化龍橋皆沉於河潛夫為人倜儻好持高節而負氣敢前能犯事機之難發憤趨赴性孝友諸弟共居飲食三弟麗明祚明麗明從潛夫軍中為總兵官時闖賊亂河南麗明率收復數縣單騎衝賊壘兩股被箭癩纍纍然敢決有氣祚明晉明自有傳見文苑中

陸培

字鯤庭號部婁吉水令運昌第二子也聲音洪亮秀偉絕倫兒時尚氣節聞忠孝事輒慷慨動色省

其父運昌吉水讀書官舍暑不避蚊蚋寒至粟人終不偃卧紛綸貫穿與兄圻弟堦並馳名當世崇禎己卯舉于鄉庚辰成進士授行人南還益自攻苦性好延攬汲引寒士雖側陋必折節下之意所不可即貴幸不與通辛巳運昌卒培自留都奔赴長跪座前以手批頰頰盡腫嚙其臂斷血淋漓大慟幾絕究天文

河渠農政諸書旁及五緯圖識開方勾股之學黃太史道周有重望培往謁倉卒不備主客禮培志甚移書曰公奈何倨見天下士道周初不甚喜後讀培文因奇重培報書執鞭結襪所欣慕焉其為先輩折節如此甲申遊閩之溫陵聞北都陷慟哭而返

王師下浙江培入橫山桐塢嶺作絕命詩二章遂自經卒時年二十八子繁昭博學善屬文詳隱逸

姚奇胤

字有僕崇禎庚午舉於鄉庚辰成進士癸未始漸逼京師念時務最急者莫如使東宮監國守南京曰於都御史李邦華邦華曰是吾心也即拜疏入上心動會有阻之者遂不果謁選得南海知縣無何靖江王作亂使以兵科招奇胤奇胤怒不受後閩廣稱制推監察御史巡按廣東拜疏辭曰兵戈擾攘自擇便安非人臣職也遂以御史監贛州事時閣部楊廷麟尚書萬元吉連諸帥為水陸夾攻之勢倚奇胤為區畫已而游擊羅明受師敗

王師圍城城破奇胤肅衣冠再拜曰臣力竭矣時分守北門乃自縊于城樓年四十有三奇胤死於贛其子端亦以御史殉柳州之難其柩與遺孤不得歸其友吳模求而得之反葬於武林祠鄉賢

祝淵

字開美海寧貫錢塘諸生崇禎癸酉舉孝廉壬午上公車時左都御史劉宗周負時望疏救熊開元

姜琛上怒斥其官廷臣無敢言者當是時初未識宗周竊發憤上疏曰流寇方訖計典次及不宜遽斥風憲疏入下所司切責之部議褫革不報明年十月抵家奉旨逮問究主者甲申正月至都賜廷杖抗聲曰男兒志在報國安有身上書更指他人者金吾廉其詞直上之釋獄半日而賊陷京師金陵立國時臺省交薦淵固辭不就閏六月之五日作絕命詞以死年三十有五

吳懋宣

懋宣杭州衛指揮使其祖功本籍皆不詳嘉靖癸丑倭亂海上萬都督表家居聞變散家財募死士奮欲死之亟選少林僧兵二百命懋宣將之以往力戰焚其巢大破之省城獲安懋宣乘勝逐寇倭

偽遁為所扼懋宣曰死是吾職恨不殲此賊負萬公耳重創而卒懋宣表女夫也自倭發難官兵之遇寇如雷霆至不敢加一矢倭乘銳疾攻兩浙東南無堅堡自萬都督表以力戰却倭倭勢絀士氣漸奮懋宣勇而有畧死於倭表深惜之

王寅

寅山陰人徙居錢塘通韜畧膂力絕人中京衛天啟丁卯武舉以父大經征播功襲紹所千戶崇禎初遷浙撫守備寅至檢軍伍符籍多聞游脆弱不任決拾大膽曰昔南塘戚公練浙兵精銳莫敢當天下列稱鴛鴦旅遂做戚公法先狼銑次鳥銃次弓矢次鐵又次刀劍日訓旬練一年而精捍猛鷲比節制兵丁丑遷龍江都司未任調守泗州陵寢距盱眙七里盜屯集磨盤麓寅云彼眾我寡及其陳未集急擊勿失於是捲甲趨盱眙殺賊先鋒七大王士卒北向呼萬歲歡聲動天地自午戰至申賊益四集團寅矢盡力竭衝陳死癸未浙撫復檄守備賈鴻陽守泗州陵鴻陽至察山川相地脉曰兵法所謂交地宜戰亦宜

守守一年賊不敢近泗州人乃兩善之謂王以忠著賈以智免寅死贈鎮國將軍賜祭恩廕一子法平

翁之琪

字元倩陝西按察使汝進孫也中崇禎十二年武科上親簡將材擢第一任舟山守備平海寇陳虎李自成入犯京師以叅將勤王隨授總兵官南京稱行在琪知事不可為自沉板子磯

趙景和

字萬育號凌霄聞喜令繼陞子天啓丁卯舉於鄉初署嘉禾學博課士率先孝行八邑景從癸未授瀘州守未抵任瀘為獻賊破乙酉二月改任廣德時國勢搶攘征輸旁午又歲值荒旱下車即嚴禁加派一意休息煮糜行賑民賴以生五月馬士英擁兵南竄挾其母偽稱太后沿途殺掠甚於闖獻道出廣德勢益張州民洶洶不自保景和檄父老告曰士英為阮楊私人齒史公劔閫外且大臣不殉國奔不奉主上而奉太后太后處深宮人莫識是必孛孛鼠竄復孛旨脅獻庫帑萬金竭民膏是盜賊也頭可斷義不為嚴城守以拒士英怒縱火攻城城陷景和坐堂皇士英突至此曰爾小吏敢拒我殆反耶景和亦

叱曰爾為元臣不與史公戮力捍圍乃專報復朋黨門戶且納賄招權一旦敗壞棄君仇家抱頭竄又輒冒稱太后而擁兵淫掠爾則反耳吾拒賊義也士英語塞顧甲士兵之遂遇害百姓悲思為建祠於州東今崇祀名宦妾秦氏聞變升樓躍入晉井死子蒼壁方九歲僕錢義匿之得脫康熙壬戌成進士以捍夏逆亂擢監察御史

國朝

王萬鑑

字人玉號靜延其先越之山陰人四世祖徙錢塘萬鑑遂為錢塘諸生以廩餼充國朝戊子

鄉貢授福建潘幕攝將樂縣事土賊吳揚據險為亂抄掠良民萬鑑下車立徵科法給帖招徠以糧申為驗禁挾仇妄扳旬日之間化寇為民而糧亦完足四境以寧尋陞江西萬年縣令值閩逆倡叛饒廣二郡為之內應萬鑑赴省請兵為勦滅計遂恢復縣治陳兵以守招集流亡凡受偽劄者槩取火焚之令反側

者自安或有以上司聞為不便者萬鑑曰皆吾赤子不過為賊所迫耳我在禁勿復言由是被掠者皆歸命恐後自春徂夏持守久之計請益兵為阻險計甫出北門而賊猝至萬鑑力戰以拒被砲石所擊死焉其家丁四人及衙役眾人皆從死事聞巡撫具題奉

旨贈江西布政司叅議

賜祭墓有加禮蔭一子王國治

高咸臨

字與侯順治乙酉貢生丙戌任福建永安令時

亡民樂安堵如依慈父母焉丁亥賊陷建寧遂犯永安相拒半載屢設計破賊既以隣邑失守糧久絕城陷不屈死之事聞奉

旨贈按察司僉事

賜祭墓蔭一子鳳采任山西靜樂令

王起彪

字虎子錢塘人順治丁亥進士戊子授德興知縣時饒郡寇多竊發將之任人多危之彪曰吾

奉命治縣綏靖吾職也敢以難辭六月入城適八月鄰邑曹董二賊擁眾猝至彪率民兵守禦寡不敵賊執之幽於十三都天君廟脅之降不屈遂遇害以歷任兩月臨難不失節邑民請祀名宦總督李之芳爲序作

論曰褚于兩公已見乎大臣今仍登諸忠節以非二公不足以槩千古之忠也苟息曰其濟則君之靈不濟則以死繼之褚公死于不濟者也于公事濟矣而猶不免于死豈不痛哉然二公之事炳炳麟麟照耀史冊雖兒童婦女盡知之其他爲社稷死爲社稷亡者自唐宋以迄於今備書于左以見忠無大小云

錢塘縣志卷之二十一

錢塘縣知縣南樂魏嶸纂

人物 理學

濂洛關閩之傳自宋始著而閩尤特盛自龜山先生傑興一時如豫章羅從彥崇安劉勉之皆卓卓稱高弟獨於浙寥寥焉再降而求之一邑中益不可得張文忠其碩果也賢聖心傳藉此一人爲斯地重後之聞風興者不多觀擇其文行無忝有關名教者附焉志理學



宋

張九成

字子韶由錢塘徙鹽官八歲默誦六經十四鄉貢從楊時學權貴託人致幣日游吾門當薦之

館閣九成笑却之紹興二年策士詔以直言置高等九成所對謂禍亂之作天所以開聖人上及二聖忠憤激烈下及闍寺無所顧避高宗感動擢置第一楊時遣九成書曰廷對自中興以來未之有非剛大之氣不為得喪回屈者不能為僉判鎮東軍大書屋壁曰此身苟一日之閒百姓罹無涯之苦趙鼎薦之名入著庭時樊光遠首南宮汪應辰魁大對帝語九成曰殿省居首皆卿門人對曰臣不敢以利祿之說誘門人惟知講明經術庶盡忠孝尋除浙東提刑力辭詔與小郡又辭乃與祠未幾召除宗正少卿遷禮部侍郎尋兼侍講進讀春秋因言日食之變本於惡氣惡氣之萌本於惡念惡氣所觸則日月薄蝕五星失序災及五穀怪妖疊見為兵為火札瘥並至願陛下正心術以格天高宗聳然曰當為卿戒之又論齊宣

王不忍一牛之死仁心發見為王道端倪推此心以往則華夏蠻貊根荄鱗介皆在陛下仁政中高宗問和議九成言虜情多詐不可不察秦檜惡之九成以趙鼎黨求去謫守邵州落職詹大方論其謗訕謫居南安軍凡十四年談經自樂因自號橫塘居士檜死以秘撰起知温州惠利及民民至感泣丐祠卒上嗟悼復敷文待制官其弟若子四人學者稱無垢先生有向書中庸大學孝經語孟說無垢錄行於世理宗以九成有明道之功特贈太師封崇國公謚文忠

郎曠

字晦之從學於張九成嘗編橫浦日新錄以儒學知名或謂曠世系與侍郎郎簡同譜曠曰我家白屋豈可妄拔華胄識者偉之淳熙十四年特奏得官未任卒

國朝

應撝謙

字嗣寅號潛齋郡諸生撝謙天性孝友動必中禮為諸生盛名譽食餼讀五經四子先賢性理

諸書殫思研慮辨惑析疑必期合於聖賢而後已其  
 學以躬行實踐為先肆力禮樂刑政農田水利選舉  
 學校以及師旅賦役之事無不講求考源竟委其所  
 以教人者一遵胡安定之教乙酉後不應制舉教授  
 自給束脩之外不妄受家貧外無應門環堵蕭然樂  
 天知命居委巷四方賢士多造廬而請以一見為幸  
 謙律已甚嚴責人常恕接物溫恭不見人之過故人  
 多親之戊午舉博學鴻儒兵部侍郎項景襄以撝謙  
 應詔辭疾不赴癸亥七月病卒年六十九門人著籍  
 者不下數百人所著有周易應氏集解禮學彙編古  
 樂書教養全書潛齋文集巡撫河陽趙  
 公祀之鄉賢并刻所著性理大中行世

錢塘縣志卷之二十一

錢塘縣知縣南樂魏崢纂

人物 儒林

儒之名廣矣大矣理學猶為儒之一耳然而理學至  
 重非如周程張朱諸君子不得入焉至曰儒林則概  
 儒而名之其間人品不一錢塘敦行積學之士彬彬  
 不乏往牒所載與夫近時所採皆卓犖可觀足以衛  
 道維風者也志儒林

吳

范平 字子安其先銍侯馥避王莽適吳因家焉平所窮  
典墳淹貫百氏舉茂才歷臨淮太守有異政孫皓  
時謝病還家累名不起卒謚文貞賀循勒碑記其德  
行三子爽威泉並以文學知名泉子蔚爵關內侯家  
世好學有書七千餘卷遠近來讀者嘗百餘人給  
以衣食蔚子文才幼亦知名宋祀蔚於鄉賢祠

陳

全緩 字弘丘幼受學於博士褚仲都篤志研玩得其精  
微梁太清初歷國子助教兼司議郎專講詩易入  
陳累遷紹興王  
府咨議參軍

宋

盧禎 字叔敬自幼穎悟及長曉五經大義酷嗜周易孟  
子端拱初登進士第調補真定東鹿主簿未赴官  
卒年二十七嘗著五帝皇極  
志孺子問翼善書數十篇

錢象先

字資元進士高第呂夷簡薦為國子監直講歷  
權大理少卿度支判官河北江東轉運使召兼  
天章閣侍講加龍圖閣直學士出知蔡州象先長於  
經術侍邇英十餘年有所顧問必依經以對反復諷  
諭遂及當世之務帝禮遇甚渥故事講讀官分日送  
進時象先已得蔡帝猶諭之曰大夫行有日矣宜講  
徹一篇徙知河南府陳州復兼侍講知審官院持心  
平恕旁通法家說條令多所詳定復知許穎陳三州  
以吏部侍  
郎致仕卒

關魯關注

大中祥符進士歷守池台二州為尚書郎年  
八十歸老陳襄為作鴻飛之詩謂其能以禮  
致仕而老成之德不衰請養於朝天子不能用以皇  
祐四年卒八子皆學行修立以進士舉者六人景仁  
尤著景仁子注字子東登紹興五年進士嘗教授湖  
州與胡瑗之孫滌求瑗遺書得易解中庸義藏之學  
宮又錄瑗言行為一帙意在美風俗新人材仕至太  
學博士卒自號香巖居士有關博士集二十餘卷

陸滋

字元象世家於杭曾祖超以功為錢氏衢州刺史

滋通毛鄭二詩易春秋既冠舉於鄉以母病不行後三年復在選察母有難別色亦不忍行陳堯佐時使兩浙與滋書強之行滋謝不受博極群書或引以答客問必章解句析不差一字問者退輒服謂終年讀書不如與陸先生一日語尤嗜風雅日哦木石間有以家事白者麾使去曰毋溷我皇祐四年詔錄先朝遺士縉紳逢合等百餘以狀白府請用滋應詔府上之朝得杭州文學嘉祐六年卒滋性寬厚嘗治居材已具隣有以侵其地告者滋笑曰吾忍以券白汝妄耶即命縮其材自就學至垂沒未嘗去書所著詩賦文論合二十卷

李綱

字國紀乾道間以上庠賢士寄居吳興之新市力學好古雖困窮操履益堅怡然自得不為外物異

端所搖奪撰聖賢事業圖籍說三先生西銘解厚德錄言行篇諸書

沈括

字存中博覽古今於書無所不通舉進士為揚州司理編校昭文館書籍累遷翰林學士神宗嘗欲

籍民車備敵括言古人所謂輕車者兵車也今民間車不可用遂罷括以文學著嘗上熙寧奉元曆編脩天下郡國圖所著有春秋機變溪筆談長興集行世有叔邁遼世所謂三沈者也

元

吾丘衍

字子行太末人從父游太學居錢塘性高潔博通子史百家篆隸逼秦漢詩效李賀雖眇左目

跛右足而風度蘊藉言笑可喜每自比郭忠恕隱居教授獨處一樓訪使徐琰造其門衍從樓上呼曰此樓何可當貴人登耶願明日走謝琰素重衍笑而去竟亦不謝後以無妄被逮義不受辱赴水死諡貞白先生所著楚史稿杞晉文春秋行世

明

周倫

字叔昌右衛人穎敏博洽正統甲子舉鄉試歷嘉定容城訓導終永寧教諭所至講讀無間寒暑至

老不倦教人曲盡其道事上以禮耻隨時容悅與人言剖析是非不為依違未嘗枉己以干權勢為廣文者三十年意泊如也喜赴人急難排斥異端有剛方之節貪儒者聞風憚之

**方可立**

字兩游九敘從子選貢仕安慶別駕諸生有以孝友博洽著者九敘愛之如已子為人耿介端方刻苦操勵比歸敝衣冠徒步里中人莫知為鄉達也精心經學所著述雜見別集

**孫景時**

字成叔杭之右衛人性耿介與越人汪應軫仁之為人師事陽明甘泉二先生正德丙子舉于鄉筮仕長洲教諭遷攸縣令却餽贖謝常例雪貧民唐如景吳伯先枉狀逮豪右易消發其奸贓論如法人多稱之解官歸乃蒐輯典故與證以長老舊聞作武林文獻錄杭州府志未竟卒

**陳善**

字思敬父荆獻博學端方從王文成先生游善幼穎異從父游文成門文成曰此任道器也弱冠舉

進士三令巖邑擢郎官督學滇粵士蒸蒸向風所至俎豆之仕至雲南左布政使疏止採金貢象諸弊政當大計無片刺通政府時多其抗直事見世廟實錄未六十予告歸講明理學郡中推為大師賦性端樸步中規矩危坐終日無疾言遽色家範整肅庭屏悉題古人言行遵行古禮尤好施濟貧待以舉火者甚眾收掩道殣修治東新餘杭諸塘慈雲黃泥諸嶺壬午民亂相戒勿犯其室纂修杭州府志十年而成書子植槐太學生有父風孝友尚義父歿二十年私居不釋衰經竟以遷墓哀毀卒所著有自警新篇

**陸振奇**

字言冲生有至性敦孝友工文章與里中鄭徵士之惠馮祭酒夢禎葛太常寅亮虞司勳淳熙及雲棲僧祿宏為莫逆交殫心經學講貫不輟寒暑時靡臯比弟子環而請業嘗百十人論難義易精田何丁寬之學歷聘四方所至奪席於新安說經尤久學者稱為庸成先生萬曆丙午舉于鄉著有易芥十卷學庸心性解年三十六卒時痛惜之孫彥龍善詩古文

國朝

**沈蘭先**

一名昀字旬華讀書好古有聲庠序及壯棄諸生精濂洛之學晝夜講習披帙游覽所著有宋

五字要言四先生輯畧又以經術諸儒紛然聚訟博考異同著四書宗法七經評論嚴訂喪禮一以朱氏為歸尤長於典故凡勝國末年遺事精覈其邪正曰某君子某黨人最詳贖有體蘭先為人簡樸獨行已意嘗危冠敝衣步市中家屢空不為動一門友愛藹然可親所交皆天下正人師事則山陰劉宗周同里吳太冲易簣之夕門人問曰此時先生誠敬當無少間答曰爾爾語畢而卒父之龍力行士也蘭先成就亦由家教云

**陳廷會**

字際叔好學貫穿經史性沉毅少許可與陸培柴紹炳孫治相友善所為文沉博雄麗培死廷

會亦杜門不出人爭掃室布席杭守稽宗孟式廬訪之欲延講學辭不赴一生畏慎矜惜名節不妄受人

惠年六十一所著有瞻雲集行世子調元篤學善屬文能世其業

**柴紹炳**

字虎臣生而穎敏博極羣書與陳廷會倡為典瞻工麗之文名冠一時炳貌寢然出言有章常

屈其坐人壯年謝去舉子業嘗一至長安旋歸里教授生徒晚年為文漸歸平澹綜核古今典禮輯而論之又憫聲韻淆訛為古韻通數十卷所著有翼望山人稿兄子世垣字恭季孤潔特立博學好古年六十卒無子

金坑縣志  
卷之二  
三

